

四庫全書

集部

欽定四庫全書

太倉稊米集卷二十二

宋 周紫芝 撰

詩四十一首

樓居雜句五首

吳江橫絕斷雲間
白鳥歸飛去不還
烟樹青連越王國
暮潮聲過海門山

湖光山影入樓明
曉色催人夢自驚
畫棟去天無一握
青山銜月恰三更

上方重閣亂山前噴雪跳珠日夜泉
整借小樓聽雨睡更攜官焙與僧煎

五月江南烟雨時吳儂初喜餉楊梅
綠枝紅雨連山暗應似瀘戎摘荔枝

人間第一東南郡天上飛來碧峭峰
更乞老僧雙不借為君穿盡玉玲瓏

雨中湖上晚歸書所見三絕句

菰蒲風裏棹歌遲屬玉雙飛欲暮時
荷葉吹香送歸客

片雲催雨濕燕姬

誰家歌管載涼州何處跳珠入柁樓
山雨忽隨雲渡嶺明眸還與水爭愁

風荷憶伴醉顏紅湖水重來照雪翁
此世相看最長久只應南北兩高峰

孤山新作三賢祠

白樂天蘇東坡林和靖

兩公才力盡驂騑俱得東南第一州
易濕青衫江上淚難禁白髮海邊秋
此生名字依然在晚歲功名亦未酬

處士若無當日節更將何物配風流

晚至靈峯

綠樹千枝與萬枝靈峯寺裡看楊梅
青山行盡且歸去紅子熟時應再來

山前山後僧來浴兩兩三三松下行
自是眼邊無俗物老夫不浴更身輕

五月六日晚歸初見荷衣二絕

藕湖烟水欲沉沙已著芙蓉渠一兩
花擬借短蓑隨雨去

共誰同把釣魚車

參參煙柳誰家樹拍拍西湖盡日風和靖宅邊山雨急
蘇公隄下藕花紅

曉起趨郡湖上作

湖色初分宿霧餘綠蒲深處聽跳魚一枝聊作烏棲樹
五曉尚隨人趁虛老矣坐曹真戲事歸歟懷舊却情疎
未開禁鑰聽傳漏殘夢猶堪付竹輿

五月二十二日再葺靜寄

晚將華髮試青衫靜寄從來是舊銜俗子未須憐怨鶴
老夫元不負耕巖晴山有約長相見惡木妨人要盡焚
自笑飄零苦無定今年來此誦琅函

初涼

白露初垂葉輕陰漸著衣幽蟲近床語黃葉到階飛暮
雨村常暗秋風客未歸短檠還有意涼滿讀書幃

武林逢邵文伯

昔遊俱少年滿鏡青絲長別來二十載四海一戰場物

色到朋舊十客八九亡今年好時節匹馬不犯疆將軍
鏤金甲萬玉朝明堂長安人海中袞袞逢此郎驚視久
乃識兩帽俱垂霜撫事念晚晚含凄谷酸傷便當呼醺
醪暖熱澆中腸我笑謂君言語離且勿忙人生如生鬼
相值不可常況此秋物佳草木交青黃與君着雙屐尚
可相扶將願言遲明發歷井升南岡

次韻文伯與余遊孤山

客塵費爬搔佳士要推挽誰與同薄遊君來慰愁眼並

湖得名山水色淡平遠清泉手可掬汲綆不畏短何人
談醉翁但取淪茗碗古幹不受寒霜露閱歲晚向來後
庭花想像空婉娈堂堂兩使君摹畫暗丹粉名節冠今
古風流未渠泯處士一癯儒萬像共偃蹇珠玉儼在前
未肯作寒窘勝遊那可既客意殊未滿更當窮兩高豈
復悔重研果腹尚可期嘗鼎安一爨

秋夜聞雨

堂空自生秋涼簾已無暑齒蟲含微酸唧唧相對語天

公知客意夜寂誰與處慎勿遣西風吹斷芭蕉雨

酌龍井泉書聰師房二首

十里泉聲咽斷巖繡衣玄衮閉朱龕老翁不要千山雨
只乞龍君一酌甘

八十霜髭不出門老師猶是辯才孫高人已復如雲散
舊事那堪與客論

太學落成二首

偃革逢華旦三雍識漢儀明倫先太學首善自京師聖

主脩文日諸生望幸時宸奎在輪奐萬目仰宏規
當宁敷文德賢關喜氣多橫經將正坐講藝忽投戈雲
擁橋門路風搖辟水波小臣歌聖化無地獻菁莪

秋日臥病效唐人作語

畫閣蘭膏欲盡初小窻留住玉蟾蜍欲知此地愁多少
一夜秋聲入井梧

此夜秋懷誰得知幽蟲相語替人悲自從啼破黃昏後
直到寒窻無月時

西谿道人全一堂

道人不受葛藤禪參得維摩妙法門頗怪後三猶有說
要從全一便歸根昭文琴在何須鼓惠子書多亦費言
聞道山中少來客爐香清坐與誰論

次韻李長感事

久將華髮寄林泉尺一呼來近日邊身退已甘無事老
眼明重見太平年鼎湖龍去心雖在長樂鍾鳴喜欲顛
解道貞元朝士少劉郎定自有新篇

種罌粟

墻根有地一弓許人言可種數十竹翁來只作三年留
僅比浮屠桑下宿竹成須待五六年我已歸鄉卜新築
園夫笑謂主人言不如鋤苗種罌粟二月春風上翠莖
三月輕紅照深綠媽花落盡罌不空碎粒圓時粟初熟
乳膏自入崖蜜甜滿貯醍醐飲僧粥與其種竹供後人
孰若栽花資老腹人間作計真眼前萬事皆爾真可憐
十年種木尚不肯百年種德知何緣倚鋤自顧頗羞澀

病眼對花空惘然

周秀實陳庭藻攜酒見過徜徉湖山間甚欵明

日秀實有詩乃次韻

少年懷二妙一日如三秋豈料京洛間歲暮方從游空
疎坐晚繆清楚知前脩周郎古名士功以一戰收太邱
亦賢者盛德令人羞周旋奉談笑領畧開羈囚有如我
輩人夫豈公等儔窈窕尋遠壑共賦臨清流青山儻在
眼白髮從滿頭西湖如西子好句豈易酬不敢妄作語

恐有不下鷗。微君妙篇章。何以寫我憂。人生每如此。萬戶不足侯。斯盟儻未寒。小艇尚可浮。

送喬民瞻赴官閩中

我昔游梁走千里。回望江南隔江水。是時公作桐汭官。不復東來問行李。人言左史有重客。玉面青衫氣豪偉。酒催紅蠟詩欲成。月墮秋江客方起。我從京洛塵中來。哦君新篇眼如洗。濺血驚魂二十年。長夢清樽奉簪履。相逢吳會不相識。昔年強健今如此。如公自是臺閣人。

老困一官何乃爾只今尚作入幕賓無事不令公怒喜
丈夫要當列鼎食何止忍飢分斗米且須拄頰望闕山
飽看麥秋丹荔子

送關康子將還青陽治舊田

關郎人物妙人間莫作雲長一樣看不到青雲知有命
頻遭白眼坐無官紉蘭秋浦應須爾索米長安政恐難
我欲買田猶未可但令歸夢逐征鞍

書杭僧法惠事後見邊郎中觀音感應記

眼中鐵彈不辭枯骨井重波事亦殊不用三三前說法
要須六六後還珠

次韻葉兵部九日不出十日登北高峯

登臨一笑與誰同此事人間未易逢莫恨清樽負重九
且看黃菊笑西風江連碧海潮初上山近丹霄路欲通
向晚歸來得新句便知雲夢落胷中

頃歲盜起徽嚴間兵既臨城部使者而下皆棄
官以走別乘強幼安攝郡事解衣高臥而賊

不至城遂以全僕嘗作送行詩以書其事後
二十一年歲癸亥幼安始得州相遇于錢塘
幼安猶能誦鄙詩而余漫不復省矣手錄見
遺讀之惘然為題三絕其後

當年玉食軫深憂兩月東南棄八州只有孤城強別駕
醉中看雪倚江樓

使君功大苦難酬埋沒孤忠二十秋便擁一麾知未稱
伯郎猶解得涼州

江上孤城欲破時
閉門高臥復誰知
我無文字銘金石
安用煩君寫惡詩

張鼇詩

并引

青城山道士張鼇者清獻趙公客也鼇從公
游甚久嘗于夜半酒間得雙鰕于盆盎如左
慈為曹公得鱸魚故事人頗異之後數日別
公而去出懷中秘書一篇以授公曰讀此書
則黃金可成願勿泄也公笑而不答命取火

焚之鼃喜笑曰公自是可延壽一紀已而果
然錢塘強行父幼安清獻出也嘗作詩紀其
事出以示僕且使同賦以附卷尾

曹瞞舉漢鼎一目窺九州凌轢欺孤兒大蒙口舌羞左
慈有道者何為與之遊堂堂清獻公盛德豈操儔鼃乃
元放徒為公亦少留了知高世士至意俱難求先生兩
琴鶴清節貫白頭雅宜鴻寶書取火遽自投公今騎箕
尾笑談閱千秋椿年亦細事蟻夢輕封侯強侯公自出

矯矯亦此流作詩紀異事誓將踵前脩
愧乏大手筆為公著嘉猷

去年聞載揚在武林及余至而載揚病已久逮其歸則逝矣乃追用往時九日詩韻以悼其

亡

與君一別幾經秋忽作脩文地下游
詩憶向來雲態度人今何在柳風流
西湖烟月生前恨客路風霜晚歲愁
勝日交流半零落數行老泪倩誰收

次韻德莊惠南城紙衾且示妙句

范公古遺直富貴不自娛平生一布衾歲晚眠粗疎至
今鑱新銘尚得司馬書此老抱剛節豈與公孫俱乃知

枯槁士白單良復須

南城謂紙衾為白單

衰年忍風露蹭蹬來東

吳感君借餘溫此意知何如青氍毹寄幽夢蕙帳羞吾廬
得此林下具爛錦不願餘况乃粲佳句薄袖翻明珠恨
我無蒼珉為君載龜趺願與冰雪姿卧起同卷舒荆土
作翠被此俑無乃愚問言擁六尺豈不賢一襦

十月二十日晨起見枇杷

枝頭紅日退霜華
矮樹低牆密護遮
黃菊已殘秋後朵
枇杷又放隔年花

夜宿淨慈明日當宿齋宮

上方枝策記當年
彷彿天宮五日間
老去新添唯白髮
重來好在只青山
已憐雪意催寒急
更遣泉聲喚夢還
明日郊宮裡社稷
此生猶得綴朝班

太倉稊米集卷二十二

欽定四庫全書

集部

太倉稊米集卷二十三至六

詳校官庶吉士_臣李如筠

主事_臣呂雲棟覆勘

總校官編修_臣倉聖脉

校對官中書_臣高中

謄錄監生_臣范鳴謙

欽定四庫全書

太倉稊米集卷二十三

宋 周紫芝 撰

詩五十八首

齋宮夜雨明日大雪

郊祭嚴祠事齋宮肅夜寒
鸞刀催宰急庭燎及晨難
雨濕牛羊俎烟埋幣帛壇
南山忽清曉萬玉已嶺岏

聞耘老猶在雪川

孫耘老名有功徽人能詩

湖上雖相見重來失後期
風塵為客久舟楫送歸遲
鴈

遠無消息梅殘惱別離何時酌君酒爛漫說新詩

十一月十一日夜步行中庭月色明甚作詩三

絕

冰輪漸出海西頭身在三吳近海州賴有梅花管羈客
細分疎影上駝裘

香風嫋嫋月娟娟月滿中庭夜悄然只恐大羅天上有
人間今夕是何年

少年邀月伴清樽老去空餘滿袖塵多謝蟾光深有意

尚來同我作三人

二十一日雪中歸資國

出門天意已垂垂湖上回鞭雪滿衣人在水晶宮裡住
馬從銀色界中歸樹頭雲凍依然在湖面鷗寒斷不飛
今夜燈前有殘檣擁爐深閉一蓬扉

蠟梅大有生意

幽芳念初分厚地凍始裂耐寒憐孤根忍苦度尺雪誰
持萬金良起死醫寸藥伶俜初回姿荏苒似看葉灌木

猶未成已與凡草別平生冰玉交勝韻頗奇絕微風折
輕黃香霧濕寒月斐几著冰壺餘芬散清樾只今滿眼
花想像疑可折感君分似意老味倍欣悅添我小窻春
芳意未衰歇盛德不可忘封殖寧敢闕

石佛道中隔水梅花滿山

平明跨羸驂遙遵石頭路循山一谿橫隔水得幽處樹
疑虬龍驤石作蒼虎踞雲菴有遺屋突兀在煙樹方壺
豈不佳弱水無船渡空餘惱幽香梅花滿春嶼心知姑

射仙茲焉飲風露水自平湖分香從一山度風姿不自持照影各矜顧安得從之遊徘徊著雙屨

書東窗二首

枕上青山翠撲衣西湖郡更似西施苦無能事王摩詰
領畧煙鬟却要詩

湖上梅花春意回水光山影入銜杯無人許我分幽事
故遣雙飛屬玉來

次韻強幼安歲晚感事

寒日催殘歲新詩得夜光雪猶隨處有梅亦為春芳愁
鬢何從白流年有底忙官閒應放臘燕寢自凝香

歲晚雜題四首

安穩三冬計棲遲一舍寬卷簾唯水近倚杖得山看老
罷人誰數天寒歲又闌自無稽古力未可怨儒冠

二

草色無人地梅花近臘天擬飛猶未雪將盡欲新年漫
與空成恨無求合信緣平生為晚計老去更茫然

三

倚杖千山裡窮年一水濱有官羞隱吏無句作詩人雨
送燈前夢難催臘後春孤山林處士笑我是比鄰

四

老病時攜客斜陽更上樓山寒猶有雪湖晚最宜鷗詩
可書幽事兒能伴薄游人生每如此吾意復何憂

次韻幼安寺丞感舊見示

當時長嘯敵先摧不費官軍一炬灰殘寇自驚風鳥散

使君方看玉山頽櫻城捍賊今亡矣抗疏論功有是哉
相見可堪談舊事為公搔首一裴裒

甲子立春口號四首

梅花消息未闌珊春入千門笑語喧人道上元新甲子
從頭却數太平年

春來玉燭又初調盡喜官儀是漢朝御道雪晴方試輦
彤庭日暖漸聞韶

力爭和議衆初疑事在君王子母知舊日塞垣啼鳥處

如今長樂曉鐘時

晴日初生禁籞春苑花宮樹一番新君王勤儉無行樂
只作銀鈎賜近臣

元夕前三日書事

舊歲冬餘雪今年雨復晴奉常新奏樂蕃使近朝正燈
火黿山路風光鳳輦城須煩天一笑四海盡無兵

二

落日滄江上潮回水自平雲連子胥廟山接闔閭城海

岳朝吳會衣冠奉帝京
端門舊燈火還向此時明

飯餘過揔持菴

飽飯度永日問隣從小園
閒攜居士杖來扣揔持門花
木無人見文書聽客翻
更將方外事細為老夫論

德莊別後以詩見寄再游錢塘始見之次韻奉

答且以叙將別之意

分作經年別還成一笑同
看君鬚點漆羞我鬚吹蓬
共醉寧非夢緣詩各坐窮
相逢又驚散往往似征鴻

二月二十三日薄雪

湖上春風結暮陰
亂雲堆雪晚來深
便隨柳絮飛將去
誰管桃花冷不禁
自苦多愁成客恨
不關難測是天心
乘除妙理誰能會
明日朝暾忽滿林

次韻子東春雪

春光早已到千林
尚有餘寒壓曉衾
解作飛花朝款款
絕勝疎雨曉淅淅
無田亦有三登意
是瑞何妨一尺深
雪裡故人誰過我
西湖崑壑似山陰

湖上戲題

一湖春水綠漪漪臥水桃花紅滿枝
去住雲情渾不定陰晴天色故相欺
風前柳作小垂手雨後山成雙畫眉
何必娉娉仍嫋嫋西湖應便是西施

後二日又題一首

家在東灣古渡頭柴扉草閣枕寒流
無人擬彈能言鴨有眼那驚不下鷗
月裏踏歌何處社樽中載酒幾家遊
溪南溪北村村水春雨春風日日愁

後五日又題一首

幾日春風大放顛
晚來寒日露晴天
浪紋隨棹湖如鏡
日脚翻鴉月似弦
便可飽看花入眼
不應直待柳吹綿
庾郎分得愁千斛
肯與青絲作少年

湖居無事日課小詩

春湖潮滿入青天
浪拍東風打釣船
人在空濛飛絮裡
鳥啼紅白亂花前

天上陰晴不可猜
兩番雲黑又雲開
鷺從落日山邊去

魚趁晚湖潮裡來

茶了詩窻飯後杯
兒書未熟急須催
鳥於花外喚客出
山自眼前將句來

老向華胥占一窻
無心更夢小雲郎
城居可似湖居好
詩味頗隨茶味長

花枝滿樹雨添肥
晴色十分春又歸
一生萬事無不爾
行年六十盡成非

多情白鳥去還來
無事風扉閉復開
山下一帆衝雨過

水邊雙燕得泥回

海內名流詩有宗時傳佳句落閒中不道建安六七子
可是近時三數公

次韻同季夜宿松園兼呈清照師

鶴骨松園老霜髯八十春相逢看日夕留客賦詩新
鬼亦來聽法誰應可作隣折腰營斗粟寧不愧斯人

強幼安用余與曾同季唱酬韻作二章見寄謹用
韻為謝

江國從游地花今幾度春老唯羈客在情獨使君新未
敢論傾蓋應須托善隣如公真盛德舉世更何人
花落青墩寺誰從作好春錦囊題句近舊旆得州新老
手摧強敵餘風睦四隣他年數循吏神爵有斯人

寄李司農三首

東閣當年夜華燈照別樽斷碑思鴈塔佳客愧龍門豈
料三吳路相逢一水村只今懸望眼猶欲黯離魂

徽水定何處謫官今幾時長沙應有賦南礪可無詩柳

絮催春遠梅花寄客遲誰憐憶公久頭白少相知

謝眺南齊守司農古漢官杯今與誰把山亦要公看細
札頌何日離騷讀又殘侍郎兄弟在往往上金鑾

客舍春寒

每日東風吹暗塵小池幽樹不成春妨他燕子關何事
折盡梅花最惱人愁裡了知身是幻老來惟與睡相親
去年湖水渾依舊欲買扁舟釣白蘋

洗馬行和關子東韻

憶昔四海多甲兵，令嚴細柳將軍營。
鐵衣健卒持滿立，黑頭壯士從軍行。
眼前十馬復萬馬，寸土不耕犁與駢。
自從虎皮蒙劍戟，此馬不聞輦鼓驚。
只今盡浴長安水，七十萬匹俱長鳴。
風駿霧鬣久不試，日饜官粟無斗升。
廟堂伊呂自有策，不與韓白齊功名。
圉人但喜馬肥健，野老安知無戰爭。
有君如此豈不樂，俟河幾時今得清。
不須天育驃騎種，雲霧晦冥方降精。
我欲刻石上浯水，白頭弄筆羞書生。
不聞鐵騎響鳴鏑，但聽玉簫吹九成。

讀楚詞三首

借令無策拒強秦何至甘心受虎吞
楚國已墟三十載
區區猶念爾東門

方從黃棘望回驂可笑襄王又信讒
已分世間無鮑叔
便須水底覓彭咸

人生長策是同流却遣何人為國憂
鼎鑊軒裳俱一死
屈原何得畏陽侯

夜中聞雨枕上作

老去飄零日春愁爛漫中詩窻窺窈窕睡枕聽朦朧弱
柳妨晴態小桃吹落紅顛風莫相惱花事不關儂

為人賀沈鎮江生日

一麾新領浙西州重說當年八詠侯要遣敵人知宿將
故乘輶傳作遨頭竭來京口頒明詔便合甘泉從禁遊
紅袖相扶客為壽莫嫌和月醉西樓

甲子重新數中興濟川人為聖時生五花名肅金鑾殿
八陣威寒鐵甕城賀客杯觴方潋灩使君忠力轉精明

祝年有意留公住只恐調元要老成

春寒

楊柳毵毵一水間梅花憔悴雨霏霏
春愁已自難禁酒病骨何由更耐寒

種蘭

桃花花中偶並欄依然風味是幽蘭
莫因移種長安市不作春山一樣看

種萱

萬事全歸兩鬢霜
新愁盡屬少年場
如今乞得忘憂草
已自無憂可得忘

次韻張元明同邊郎中遊西湖二君講同年之
好有此游

十里春波翠染衣
小尋魚鳥共追隨
船頭風急何妨醉
湖上山多盡入詩
藜杖偶來飛絮裏
蘆鞭猶憶看花時
兩公人物如連壁
同上金鑾亦未遲

皇帝親祀高禩十五韻

歷欲縣洪祚郊宜築巨臺有司脩祝冊天子祭高禋意
與群情合春隨上瑞來翠輿瞻玉座桂酒奠金罍喜色
回中壺歡聲入九咳熊羆占已兆弧矢射將催異禮闕
宗社餘波被草萊靈基千歲永玉葉萬枝開制度新儀
著歌詩舊典該魯侯徒復宇后稷始封邨帝德應先格
天心亦易回至誠參造化妙響疾風雷歷數周家久封
疆漢地恢山河今壯矣瓜瓞信悠哉準擬螽斯詠微臣
愧不才

校李從一臺閣集因效其體

細誦台州句湖邊草舍幽好山來競秀清瀨與爭流吏
可供書札兒能伴校讎小窻誰共此唯有夕陽留

二

舊旆來分賴唐朝有百人諸公皆泯滅此句獨清新異
世名空在今年迹已塵何由弔高冢一望石麒麟

次韻子東奉命祠高禰齋宮望臨平山

遙想祠宮曉色寒卷簾聊此看孱顏宮閣頗似蘇司業

詩好全如庾子山覓句不妨煙雨外浮家猶記往來間
舊游有意重回首恐上金鑾未得還

太倉稊米集卷二十三

欽定四庫全書

太倉稊米集卷二十四

宋 周紫芝 撰

詩五十八首

甲子春日二首

燕來不擬著簾遮
要聽雙飛語日斜
芳草滿庭人不掃
東風吹盡石楠花

海棠枝上曉鶯啼
梔子花邊蛺蝶飛
貪看游蜂偷藥去
不知雙燕得泥歸

與王漕乞張右史集二首

文采推前輩兒童識姓名日邊張右史江左謝宣城自恨空飄泊無由見老成著書如可得尚足慰生平

二

張緒風流士文昌古淡詩發揚知有助埋沒竟多時公已勤讎校神應作護持何當遺珠玉璀璨滿書幃

對雨

風細寒猶甚愁多睡更濃閉門春色裏盡日雨聲中草

各爭先出花皆稱意紅故人書信少不記此哀翁

晚行湖堤望南山諸峯

曳履步遠壑挽衣枝短筇霽色過急雨餘霞漏微紅照
眼一湖淨環湖幾山重不知何禪燈明滅蒼翠藂但聞
煙霞間繞山鳴亂鐘暮年行樂意不與足力窮明晨倘
可遲尚堪歷諸峯有幽固當探無客誰與同餘子不足
偕形往影自從言旋且當爾興在何由終

謝曾同季示近作因以為贈

老色秋蒲晚朱顏玉樹春年方賈生妙詩似庾郎新黃
墓初傾蓋青墩欲買隣知君真似舅笑我作陳人

同李幼安之甥

同季再見和二首復用韻以謝

花似今年好情非舊日春光陰愁裏盡風物眼前新愛
酒聊呼伴無醺懶乞隣姓名誰掛口肥瘠付秦人
海內同為客西湖共送春定交前日意識面此時新一
笑欣良會餘生得善隣風流美無度往往似前人

送秦德久守安豐

師行朔野不記年兩淮千里無炊烟君王偃革似建武
始遣循吏來安邊今日安豐非故壘夜聞漁歌隔淮水
況當兩國不交兵高塹深溝豈須爾朝不鳴刁夜滅烽
吉語上聞天自喜但令南畝棲餘糧盡驅流冗歸故鄉
會見今年八九月處處棗紅梨子黃四郊無兵門有戟
淮上山青淮水碧樽前一曲柳枝歌釀酒擊鮮公燕客
客有為予言笋不可食食之令人瘦者戲作二

絕為解嘲

庾郎三韭坐清貧
眼看將軍肉十斤
曾遣胸中有千畝
不妨人似沈休文

園蔬本自不全貧
今日真成笋作斤
已恨此生相見少
更須儂作解嘲文

今日林中頗得佳笋用前韻

閒尋黑靨貓頭筍
自把長鑱雪色斤
恨我家無渭川竹
姓名不載馬遷文

作茹須趁笋如銀
莫待成竿費斧斤
安用截筒纏五采

為人催草弔湘文

劉主簿許餉苦筍未至

苦竹岡頭竹似雲
劉郎何事不揮斤
杯盤倘使同吳俗
荼薺誰能作楚文

未敢煩君便指囷
且看分筍不論斤
此君自是盤中虎

空想斑斑箸下文

杭人重苦筍
呼為嚇飯虎

西湖春事五首

兩高南北擁烟鬟
渾在溟濛細雨間
寄語丹青王右相

不須水墨畫春山

老去無心作好春
曉來風雨故欺人
從教髮白桃花笑
不管簾垂燕子嗔

顛春柳絮風前落
臥水桃花鑑裏開
沙上鴛鴦忽驚起
背人飛去不回來

寒食人家畫鼓過
踏歌聲裏月生華
無人來祭皇妃墓
空唱吳王陌上花

半垂羅幕護紅粧
閒繫青驄在綠楊
樓上日長時度曲

路邊風過忽吹香

晚出郡城

天街打鼓出城門
暝色侵衣欲破昏
湖上晚峯橫玉珎
馬頭新月上金盆

次韻强常州見寄

門前冠佩眼中稀
家在西湖水繞扉
每對鳳姿羞羽翼
更因魚目得珠璣
身閒聊伴蒼官語
詩瘦空慙笨伯肥
別後清言應疊疊
不知談麈為誰揮

天申節湖上早歸

昨夜雨如許今朝雲復開
鳥聲呼日出湖水上隄來贊
祝人天喜鏘鳴劍佩回歸途
似明鏡影落翠鬟堆

食新杭有感

玉粒新杭五月黃
中含風露晚秋香
但令雲子流匙滑
莫管吳儂眼下創

次韻曾同季悼其幼子

曾侯名家郎家有玉頰
兒渥洼出名駒
丹穴生長離春

風入庭戶獨秀蘭與芝未乾弄麈尾遽草騎龜詩我昔
少年日屢作哭子癡須煩六如偈為洗長年悲

韋深道寄苔雪舟中六言五首

韋許

畫舸一帆烟浪薰風十里荷花更著千岩萬壑相隨泛
宅浮家

水繞臥沙鷗鷺浪翻擎雨芙蓉向晚柁樓獨倚共誰同
看跳珠

韋郎無意剪白次山亦漫為官要遣苔溪風雨飽君筆

下波瀾

滿眼紅粧迎笑昔年遊客經行忽得風前麗句似聞蓬底波聲

我作三吳短夢小安近水茅茨解養能言鴨子閒看似酒鶯兒

西湖月夜

月到中天火未流水邊風露已含秋問誰乞取西湖角紅藕花中著釣舟

菩提小軒驟雨晚晴

杭潁雌雄本自殊
淡粧濃抹是吳姝
滿傾漲玉十鍾酒
來看鎔銀百頃湖
白鳥去邊山潑黛
綠蒲疎處雨跳珠
不知能事王摩詰
貌得西山落照無

早發北山由麥嶺飯大通登烟霞洞閣

瀕湖兩峯高屹立
曉相望蒼涼昇海日
骭髒露千嶂羸
驂絕坡陀岩谷飽
追訪緬懷洪荒初
蘊蓄含萬象渾沌
久已死倏忽真巧
匠誰令鑿空手出
此奇險狀中虛納

游雲谷靜谷幽唱暗穴下無底濤聲想悲壯十八老聲
聞附石出遺像誰其架脩椽置屋雲雨上青山不知數
遶屋森百丈忽于兩峯間萬頃見烟浪澎湃海潮聲往
往入藜杖天公知愛山令我拜嘉貺眇焉隔仙凡欲往
漫惆悵便當學枯禪綺語蠲宿妄自足伴周旋長年此
遐放

題孤山柏

臺城依舊繞長河結綺臨春往事多但見張妃似西子

不知擒虎是閻羅當年已老瓊瑤樹此去空留鐵石柯
喬木自存非故國何須仍唱後庭歌

次韻周秀實寺丞七夕三首

烏鵲橋成不恨遲隔秋相見豈無期姮娥空傍月中去
嫁得星郎是幾時

夜深閤把玉東西月下樓空畫幕垂人似天孫酒如玉
夢中猶憶少年時

無限欄堦月下兒遙瞻星旆却嫌遲催教織女梳雲髻

想得無心理杼絲

數日秋暑不復可堪馬上作此

江上豐隆醞秋熟老病摧頽可堪說人行落日生黃塵
馬畏長塗汗流血君看此處安得詩空學吳牛喘殘月
北風何日掛駝裘長嘯灞橋驢上雪

葉宣義家壽社堂

吉人為善天所彰效有遲速理則常葉侯天驥少未驤
讀書過眼下十行易如翻水成文章學既日富名日昌

謂取富貴如探囊當時餘子皆擅場呼不成盧空繞牀
直氣勇決何可當買田築室龍池陽夜光穿屋萬丈長
人言家有明珠雙青衫歸侍讌几傍彷彿月中丹桂香
要看玉樹爭芬芳擊鮮不羨游諸郎大裘執玉郊圓蒼
旂恩厚澤均四方翁年九十鬢不霜錫以命服閭里光
門前賀客俱奔忙手持牛酒填康莊遂摘天語名公堂
不須靈壽扶徜徉高文戛玉鳴琳琅省郎言語如君房
天公報德殊未央傳家奕葉壽且康王母晝着雲錦裳

麻姑行酒傾瓊漿壺中日永醉玉觴赤松黃石相扶將

孫仲益尚書詩贈吳益先吳出巨軸索詩

少年名字滿賢關薦墨誰能借一言子產自應知季札

退之先已得何蕃

孫公時為學官

江無九肋空多士樹有三珠

且共門

益先兄弟凡三人

晚路相逢歎流落可憐不第獨劉蕡

木犀方花一首

西湖八九月秋葉日夜凋兩山各崢嶸氣與秋爭高天亦念幽絕芬芳托孤標要令列仙懼一洗桃李驕往往

遣暗香時時入高廳綠葉未改色微黃澹烟梢可愛不
可名模寫徒自勞向來蠟梅花相去無絲毫但恨此花
遲不借春雨膏尚可配精蘂傲霜分兩豪金錢不知數
狼藉蒙譏嘲可憐貴人家漬蜜紛煎熬坐令林下姿半
入金猊焦閨房漫脂澤此恨何由消

登北高峰一首

鼓楫去故里攜孥客東吳湖山森照耀魚鳥相嬉娛舉
目見兩高欲上徒嗟吁人言不可往無路登雲衢盡力

賈餘勇遂復酌宿逋白鳥入蒼煙滅沒在太虛曉日沸
暘谷萬川納歸壚海門豁中開怒濤喧朝晡盡注百丈
江拱揖朝伍胥銀湖大如許僅可方覆盂諸峯如培塿
瑣細不足圖寸眸一俯仰八極無遺餘第恨蒼涼日悠
悠迫懸車臨風一悵惘言旋戒危塗

資國巨松伐為東觀材

文字初離五阮餘緇囊縹帙秘新儲何人合在天東壁
十八公堪作校書

徐五十六索勤有種德二軒詩各賦一

首

徐從龍字美祖

平生長笑韓潮州欲持讜議回冕旒讀書城南
晚所賦無乃不為韓符謀人間達官可力取釣
名但以詩為鉤汗牛充宇作底用富貴面熱渠
當羞書生有書但自讀不必區區苦投俗偶然
一擲便成盧雁塔朝題暮天祿吾言可咲君必
輕奔軍之策何足憑臨機應敵自子事此是宋

襄仁義兵

結廬須種木樂飢須種穀種木十年能幾長種
穀眼前無乃速人生安得俟河清誰能忍飢百
年待德成君不見千古一臯陶此事世亦少
頗能化俗成唐虞何乃滅國先六蓼慎勿說夢
與癡人著意勸渠渠不曉南隣門耀三戟光比隣
牛馬谷可量浮雲變滅那得常安樂只有襄陽龐
中秋携小兒步湖隄

病裏三年月相隨過兩州為儂分素魄攜汝作清游草
樹悲今夕家鄉隔去秋有身真似夢無地不關愁

二

門接銀湖浪居仍在寶坊更煩山吐月來共水分光葉
冷初翻夜蟲悲擬泣霜幽人看不足白露滿胡床

送方元相還郊居

雲從南山來邂逅成一雨秋風忽吹散霖霖不到土出
固初何心歸亦乃其所但恨山中人弔影無誰語笑口

曾未開語離遽如許到家應重陽精藥亦已吐長衫隨
父老社甕酌田祖悠悠臥黃雲坎坎擊醉鼓人生行樂
耳何必浪自苦恨我繫微官何由共鷄黍

古風二首

夜夢乘輕舟掛席浮天池天池亦何有濤瀾靡津涯中
有三神山樓觀何巍巍晶瑩白玉闕彩錯黃金旗紫皇
遣天風下吹仙人衣仙人不知名人言是安期我欲就
與語弱水隔渺瀰鼓枻方少前風動輒去之仙人不得

見遙睇忍言歸願言哀劬勞舉手援塵姿探囊得靈丹
往往分刀圭使我生羽翼桑榆增暮輝

矯首望寥廓雲日清四方梟獍各屏跡孔鸞亦高翔鳳
羽可為儀用以朝帝皇八音奏韶護五色呈文章帝皇
在殊庭斂珮方鏘鏘顧瞻丹鳳倚高目振鷺行斥鷃獨
何事乘時亦飛揚短羽無遠志控地搶榆枋卑飛固可
笑摧折亦足傷願附翺翺翼託身雲漢傍

放龜

老黥得龜規小利小兒奪龜以為戲兒癡但作一笑看
槁死生存兩無意乃翁不忍龜縮頭何如去曳長江尾
流水長者亦念汝清江繡衣何憂苦

不睡效張文潛

寒沙宿鷺水無聲湖月留人睡不成便擬閉門尋好夢
更聽鸛鵲轉三更

觀潮示元龍

越山莽蒼天山高海門屹立通江濤江頭久客歸未得

來趁吳兒看晚潮
潮頭初來一線白
雪浪翻空忽千尺
地中鳴角何處來
水上六花人不識
驚濤倒射須臾空
千艘已落空濛中
錦帆半臂浪花裏
越商巴賈爭長雄
江湖險絕長如此
風靜潮平亦何事
人間萬法有乘除
却遣風波在平地

客許惠木犀而花殊未開三絕

秋雨不肯止
木犀殊未開
小齋寒索莫
誰剪一枝來

二

黃菊無多子孤芳正要渠誰能把秋色分付木芙蓉

三

舊日江南路霜裏曉樹間無香供晏坐有夢到秋山

旅夜

栖栖羈客眼長開
寂寂清燈落曉灰
北鴈有情書未到
寒衾無夢雨頻來
今年白髮看仍少
去日青春挽不回
別後故山應好在
小窻辜負翠雲堆

次韻飛卿

隨計京華憶去年夢魂合眼到家山
早無半菽能餬口
晚得三鍾只汗顏
老嬾不堪朱墨裡
此心終在水雲間
尺椽分我江邊路
留與他年作往還

次韻李子至與陳相之定尋梅之約篇尾見及
謝眺樽前憶語離別來懷抱只愁知
鵲鵲原近識君晚
鴻雁書遙寄客遲
何事不嫌霜後鬢
尚邀同醉雪殘枝
今年新得梅花句
華萼詩中第幾詩

次韻相之和李子至尋梅詩

江南洛社各天涯何事高人亦見思
句法風流雲爛漫
旅情飄泊燕差池樽前病骨難供醉
花下枯藤可強枝
莫喚孤山林處士揚州何遜自能詩

太倉稊米集卷二十四

欽定四庫全書

太倉稊米集卷二十五

宋 周紫芝 撰

詩四十七首

劉文卿燒木犀沉為作長句

海南萬里水沉樹江南九月木犀花不知誰作造化手
幻出此等無品差劉郎嗜好與衆異煮蜜成香出新意
短窓護日度春深石鼎生雲得煙細夢回依約在秋山
馬上清香撲霜霽平生可笑范蔚宗甲煎淺俗語未公

此香似有郢人質能受匠石斤成風不須百和費假合
成一種性無異同能知二物本同氣鼻觀已有香嚴通
聊將戲事作薄相辨此一笑供兒童

曉雪

湖色催清曉風前一雪輕不妨梅自笑要與水爭明萬
木雲遮盡千巖玉琢成可憐青竹葉寒甚與誰傾

時宰生日樂府四首

并序

歲十有二月二十有五日太師魏國公之壽

日也凡縉紳大夫之在有位者莫不相與作
為歌詩以紀盛德而歸成功篇什之富爛然
如雲至於汗牛充宇不可紀極所以祈贊壽
齡無所不至猗歟盛哉昔未有也某縣陋不
才加以門薄而地寒人微而器窳如瓦釜囊
瓢宜在草野雖欲挽而致之與鼎俎遵豆之
器雜然前陳於郊社燕享之間有所不可而
鈞播之下萬化斡旋根荄飛走並用無遺前

者拔自篋庫置之省闥俾司吏牘以主其藏
雖未得與鼎俎籩豆之器雜然前陳固已不
在草野間矣感激之私無以自發方且含茹
吻頰之間而不得吐會都人士夫奔走為壽
得不呈露鄙素為下俚之辭尾賀客而前以
謁鈞庭之下乎乃作樂府四章再拜而獻倘
欲被之金石流之管弦與一代之樂諧和韶
濩則有所不敢至若附魏晉以還曹劉諸人

殘音餘韻流傳後來則又非其人也譬如茂
林時鳥感動至和而振翮一鳴蓋有不知其
所以然而然者仰惟真人出御大寶由中興
以來每遇是日必即大第賜湛恩之燕賜鈞
天之樂所以寵異師臣以示旌功報德之意
考諸舊牒所未前聞廼作御燕曲朝庭修兩
國之好結百年之盟休兵息戰使各保其骨
肉父子之親公之陰德歲所全活不可以鉅

萬計天下休休乎日向於安平泰定之域繫
公德是賴廼作班師行時方偃武文教誕敷
民和年豐國足財阜禮之墜者復振樂之廢
者更新百度彰明萬邦悅附實我周公迓衡
之政廼作昇平謠四方無虞五兵不試國肅
以清民庶以寧當是時也家被更生之賜人
懷欲報之心皇天無私仁者必壽此天之所
以歸德於公也廼作祈年歌竊惟公之洪猷

茂烈度越曠世雖盈編溢冊不能具載而質
之四詩亦可槩見後之賢者聞而悅之將欲
鼓之舞之長言而永歌之庶幾或有取於斯
焉謹序

御燕曲

新陽入谷春欲回瑤池春早桃花開黃金三尺瑞獸暖
雲橫霧繞珠簾垂碧腴分香自紫府百壺流泉酒如許
御厨排燕羅八珍更飭梨園賜歌舞黃門宣詔天上來

歡喜時聞傳帝語紅鑾畫幕密護遮參差吹竹凌丹霞
雙成持觴萼綠勸五雲遙望羣仙家仙家日月真長久
地久天長聖恩厚願公歲歲復年年長帶宮花飲宮酒

班師行

漢兵出塞將軍行棘門灞上空屯營羽書夜半急如火
淮田千里無春耕廟堂有議如建武十歲邊頭不鳴鼓
君王無事兩國歡長樂宮中瞻聖母鷹飢虎飽不足圖
三軍漸欲銷兵符紅旗盡卷夜烽冷銅花繡甲金糲糊

橫議當年蝟毛起公持一言天自喜盡收諸將入神京
十六衛閒清似水榆闌一騎不動塵陰功何止活萬人
封侯鑄印不足說朱顏一笑三千春

昇平謠

負石填海海可乾鑄鐵削山山可平俟河之清豈易得
眼見太平真復難春風輦路官槐綠花繞漢宮三十六
喜入天顏人盡知奉常新奏昇平曲前年被袞郊圓天
今年執玉朝塗山漢官威儀久不見三代禮樂俱追還

太師功大非人力早向壺天賜新宅消得官家駐六飛
畫鼓咽咽燕瑤席紫宸朝散千官行四方警奏虛封章
衮司無事鈴索靜牙牌報漏春晝長但聞羣賢歲歌舞
壽曲聲中玉觴舉青衫小吏亦復歡自採民謠裨樂府

祈年歌

十雨五風年歲熟萬落千村俱種粟人從南畝把金犁
誰在廟堂調玉燭昔年避地今安居前日荷戈今佩犢
開元宰相不開邊當時米賤斗數錢自從罷武銷劒戟

外戶不閉俱安眠人蒙更生家受賜父老歡喜兒童顛
君不見天上宸章燦星斗翔鸞驚飛翠蛟走為言一德
似阿衡上格皇天贊元后皇天報德亦可知仁者必壽
天無私但願天心錫難老貂冠畫袞常光輝四國無兵
誰不喜共說昇平自今始黃帝垂衣坐法宮千歲常師
廣成子

冬至前九日湖水盡冰後二日晚晴小舟循湖
心而歸冰已稍開書是日所見

積雨凝宿陰寒冰結湖背鷗鷺不敢前龜魚各潛晦敲
冰得湖心鼓棹作澎湃萬玉朝明堂丁冬響環珮誰來
貝闕中小現銀色界夕陽似知人微溫散珠琲為我開
模糊遙山影空翠境勝不可名語惡聊自悔安得王右
丞萬象歸綵繪遙憐西子寒眉目增點綴

將登南高示同舍

萬壑千巖要盡窮漫將筋力試衰翁請君速辦尋山屐
同上南高第一峯

三年身在翠鬟堆，慣見湖山眼厭開。
要上雲峯最高處，試看潮過海門來。

過趙德莊官居有懷其人

送君南浦草青青，記得江邊一醉醒。
騎馬却來尋舊處，依然蒼竹近寒廳。

讀君古錦囊中句，可是紅蓮幕下才。
試問風流李長吉，如何不寄近詩來。

次韻關子東聞太常新樂

今歲塗山禹會成
俟河真得見河清
官廳無路朝元去
卧聽鈞天奏樂聲

湖上雜賦三首

青腰載雨入菰蒲
旋斫漁竿學釣魚
小向湖心作客與
天教來此伴春鋤

山邊騎馬醉王孫
湖裡撐船晚過門
寄語金丸莫輕彈
我無花鴨解人言

三年原不下胡床
飲盡山光與水光
莫把渠儂作官看

此身便是賀知章

次韻何子楚題吳傳朋石渠大字

中郎往昔游鴻都眼見帚堊心成書乃知隸法亦天授
後世豈復斯人徒周王百度新復古道家山是圖書府
吳侯妙翰絕古今高榜橫空近風雨大字三尺古所難
細書不要烏絲欄四蹄自挾水邊石兩翮忽舉空中鸞
知君自是文中虎便恐聲名傳帝所借令頭白下凌雲
寄語韋郎耐辛苦

次韻庭藻雨中不出湖上

幅巾飽看西湖春徐行當車不動塵有時乘興未遽反
武林無此尋春人湖山如螺湖水白幾見青天月生魄
年年馬上看吳娃舞袖雙裁越羅窄長安貴人百不憂
胡為亦復多窮愁出門載酒不可往倚杖看雨如窮秋
萬事不由人作計我欲除愁唯一醉此生已老復何求
五字但知公臭味春風吹雨山澤晴青山有約翁有情
故人官高少閒暇可喚白鷗同此盟

梅花為風雨所殘三絕

五更風雨各無端
留取殘枝與客看
何遜惜花心欲折
玉奴愁雨曉應寒

山西鐵面故將軍
新種梅花十里春
此地數枝留不得
東風可是惡欺人

先生舊日經行處
聞有寒枝笑曉林
便倩東風吹雨去
急携藜杖與僧尋

梅盡一首

昔家大江南沮洳不堪處五月梅子黃江雲日成雨頻
年客東吳蝸緣坐羈旅墮鳶忽當前海氣復如許食無
山鞠窮為病入腰膺游鯈與爭席共此一洲渚人生能
幾何生理亦良苦今朝有奇事兒童報佳語送梅喜追
餞入伏寧偃僂便當掛西窓悠然望南浦借風翻綠荷
分香度清暑

陳相之許惠近作久而未至雪中偶書二首

春意方回臘梅花又滿枝自憐為客久頗恨得君遲涉

世身猶爾攻愁酒若為人生俱昨夢消遣可無詩
短策何由去長鬚喚不來詩今如此少門欲為誰開淨
几塵飛盡寒窓雪自堆無人伴牢落燈火送殘杯

奉答相之再示兩詩

白髮劉郎在無心唱竹枝倦游閒未得見事老尤遲與
世知何用求田便可為元龍人物勝況有建安詩

老媿才都盡人愁雨不來酒樽無客把詩卷為君開山
色螺分翠江濤雪擁堆新篇慰愁眼喜色動寒杯

次韻關子東湖上雜書四絕

道人結屋在林邱，俗子何由得少留。
一閉衡門三十載，

為公今過虎溪頭。

清照菴

上方重閣到雲天，一落天星今幾年。
不見老坡寒碧句，

滿林風玉自蒼然。

壽星寺

舊聞春草滿池塘，何事新題荇藻黃。
寄語藕花從此去，

不須滿意著紅粧。

水荇

兩邊山木子規啼，不管還鄉客夢稀。
應為老翁推不去，

故將好語勸人歸

子規

再寄李司農二首

不作徽州夢空吟楚水邊
倉皇相別日歡喜得書年
客有誰投轄詩應我執鞭
長安望歸日消息幾時傳

衰薄功名晚羈棲歲月深
篇章唯楚些兒女盡吳音
見面知何日從公話此心
時光肯相待白髮已如林

頃與徐美祖汪養源同遊
杯渡道場余來錢塘而二
君再遊以詩見寄

當年三士各清狂下馬同尋古道場人在諸峯朝著屐
天教我輩夜分床勝遊已是成陳迹晚路何堪更異鄉
聞道重來苦相憶為君日轉九迴腸

苦筍

庾郎鮭菜不滿腹三歲杯盤入吳俗江頭四月烏賊來
經日楊梅雨中熟是時苦竹方生兒錦綉時露駢頭玉
杭人嚇飯正要虎日以千金換盈束人莫不食鮮知味
妙理聽君論反覆舌頭誰識苦中甜今乃苦口後為福

蕉中佳境甘似飴厚味可人終腊毒江南山多豈無此
苦甚何止秋茶酷天公時為餉饒人雨洗風吹滿山谷
從今不敢料吳儂但煮蝦蟆當梁肉

和張元明食生荔子

五月麦秋閩嶺寒嶺頭風雨荔子丹舊從圖畫見眉目
何曾生食知甘酸天生尤物亦甚慳路遠致之良復難
宮中妃子一破顏猶須驛騎來長安絳紗囊小欣乍識
晚上蘇臺醉瑤席人如玉筍擘輕紅詩似春雲驚坐客

書生饒相絕可憐
誦詩口角空流涎
何時遂作七閩客
日啖玉肌三百丸
猶勝窮愁杜陵老
暮年奔走巴山道
萬里瀘戎摘荔枝
一生辛苦無人知

將別湖居二首

昔年嘗判武林丞
來伴西湖寺下僧
又作移家新活計
却攜行腳舊枯藤

西子湖邊一短窓
幾年和雨看湖光
青山換得微官去
魚鳥應須笑漫郎

與同舍郎觀潮分韻得還字一字江字三首一

字江字為坐客作

時自西湖徙城居

人生如微塵同一霄壤間可笑蟣蠓眼但窺甕中天錢
塘俯滄海八月壯濤瀾始疑正練橫旋作萬馬翻海門
屹中開方壺忽當前不知何巨鰲為我戴三山銀光射
傑閣玉筍垂朱欄須臾擊飛雪噴薄上簾顏相見各驚
顧日暮殊未還那知在空濛但怪毛髮寒平生雲夢胸
始信宇宙寬安得凌雲手大筆如脩椽盡挽卷天浪參

差入豪端

烈風驚洪濤浩蕩吹海立迅雷忽翻空掩耳嗟不及漢
兵百萬騎已奪秦關入擊石驚倒流勢若三峽急滄波
忽喧豨衆目俱駭慄人言海潮來昔為子胥屈誰當語
馮夷四海今已一王春會塗山白玉執萬笏江河及喬
嶽祠祀已咸秩海神會當知萬歲拱帝室

神州古都會有美東南邦壯哉八月濤卷地奔長江驚
濤裂巨石洪鐘殷朝撞萬瓦響飛電千艘碎解艘灩澦

不足數况乃峽與瀧翩翩坐中客才器俱無雙九牛可
逆拽五鼎乃獨扛詩成咄嗟頃惡語徒喧嘩

次韻徐美祖梅花

我得孤山已恨遲水邊無復昔年枝花隨此老俱成夢
詩似徐郎今有誰隴使醉將春作信廣平應解玉為肌
五更笑語香中意只有羅浮曉月知

人日雨一首

王春雪三尺人日雨一犁五種雖未入二麥頗亦宜人

情豈不悅天意似可期官居著窮巷睡味無人知起焚
石鼎烟爛讀離騷詞看雲生屋角聽雨鳴空墀綠水添
清瑤孤芳悅華姿萬物有佳趣吾生日已衰貪癡速奇
禍安分傷寒飢乘除理已定智巧那得移不如酌我酒
此事姑置之

次韻艾主管二首

三徑頻招客羈懷可自寬湖分一水近窻納數峯寒好
句貧猶得衰顏醉亦丹官閒樂如許何地更求安

病畏空緣淺愁知醉境寬五窮空抱藝六巧豈勝寒鶴
骨全憑杖霜毛不受丹春雲莫成雪僵臥有袁安

二月十四日過初師房

故國三年夢青春二月餘閒尋憲窈窕來伴客踟躕花
倩風調護愁應酒破除老夫乘興罷歸了讀殘書

次韻李彥恢簡錢侍郎因叙將別之意

兩淮持節記當年奏計歸來雪滿顛應念故人今老矣
載瞻行旆只依然欲知鴻雁勛勞日便是鷄鸞咫尺天

況有金蘭在坡禁一生交分豈輕捐

次韻彥恢再示前作

此生難數絳人年高位由來免疾顛
自笑晚途聊復爾相逢雲路豈其然
歸心只欲開三徑薄宦何由託二天
他日據鞍如可強故人雖老未輕捐

次韻趙簽判用李漕韻見示

九陌塵中度歲年不堪烏帽著華顛
名雖已愧周公瑾詩或時參孟浩然
豈料晚途蓮幕客肯來同醉玉壺天

人間富貴須公等佩襟從今可盡捐

彥恢被旨使京西將歸待次用前韻送別因呈

鄉里親舊

知公直節自當年終不留衣與大顛胃次已能吞夢澤
功名寧復愧燕然登車莫厭塵吹帽移棹應思水拍天
歸去交遊如問我為言百事老俱捐

太倉梯米集卷二十五

欽定四庫全書

太倉稊米集卷二十六

宋 周紫芝 撰

詩四十三首

胡夫人出塵菴詩并引

毘陵胡夫人儀真鍾離君之妻也君倅高郵而卒後數年夫人夜夢道人氣貌豪偉長袖舞劍授以七棗使食之詰朝欣然若有得自是不食無漏身輕如雲夜亦不復寢矣道人

與夫人約住菴兩歲當來度汝夫人舊不識
字忽能書亦時作頌其餘與平日不少異惟
朝暮奉香火以供上真甚謹間夢童子青衣
玉盤啖以仙果狀似含桃赤如明霞意其為
丹砂也又數月夢道人授以符篆自是亦能
寫符人有病祟者求之無弗與食之亦輒效
焉余有孫女四歲两眼赤爛雨淚栖睫治之
久不差食夫人數符瞳子遂瞭然其清如水

紹興丙寅結菴毘陵名以出塵余聞而喜之
乃作數小詩以遺夫人云

漫說丹砂乞轉精
安期瓜大幾時生
會令方寸無荆棘
火棗交梨亦易成

看著桃花兩度春
尚須香火奉高真
世間安得無塵鏡
人似靈犀解辟塵

當日飛昇雲路賒
夫人原屬舊仙家
莫將林下能詩女
輕比神仙萼綠華

瑤池人摘幾番桃
月下猶吹弄玉簫
為病書符何日了
雲輶看即下丹霄

次韻君叙湖上偶作

政恐情須我輩鍾
畫船同載舞衣紅
可憐燕子無人管
不忍桃花過眼空
客睡喜聽門剝啄
君詩來送玉丁東
何時却覓孤山路
共弔梅花樹下翁

次韻君叙雨中偶作

春風作意惱春懷
更落殘紅上紫苔
無限好詩飛得去

幾人今雨肯重來夢回故國空千里酒憶徵君共一杯
看取西湖天下勝客愁應為此時開

冷泉亭放閘

呼猿洞口水潺潺忽卷奔流下九天乞得少陵三峽句
為君題作倒流泉

萬里西興浦口潮浪花真似海門高誰將一夜山中雨
喚作滄江八月濤

西窻見榴花分韻得花字

青春苦難挽白日良易斜花飛尚滿砌柳密驚藏鴉寒
窓忽當日山崦知誰家紅榴笑疎林始著三兩花繁陰
護朱閣芳姿奪明霞頗憶少年日千金醉繁華當時石
榴裙六幅圍絳紗美人隔秋水相望天一涯想像繫楚
腰依稀似丹葩對花誰與論搔首空歎嗟

次韻同舍四月十日迎駕二首

日來金闕麗蒼龍風入宮牆展鹿蔥夾道焚香迎步輦
兩班鳴玉從羣公

時平廊廟半夔龍
趙將何人說李葱
一見黃麾識全仗
始知赤舄有三公

次韻艾主管四月十日迎駕

十年不見羽書馳
萬里風塵靜九圍
又薦櫻桃入原廟
春來無事幾家肥

次韻庭藻天申節錫燕書事

千秋舞馬初登床
新歌樂府傳霓裳
當時提封三萬里
人間何處無農桑
邇來重見太平日
侍臣復上開元觴

雲門一闋天樂奏瑞獸三尺南金黃師臣擁珮燕旨酒
虎臣杖節嚴秋霜成功乃自師尚父異姓不數汾陽王
紫皇萬歲壽明主斗魁六宿來文昌三呼徃徃出靈嶽
由漢以來無此祥諸公自是列宿數玉階合望重瞳光
聖朝御極日杲杲風雨順序天蒼蒼虞階已復罷干羽
漢郡會看開樂浪小臣拜手亦稽首願祝地久仍天長

次韻庭藻再賦天中節錫燕書事

蓬萊殿角薰風涼法官無事垂衣裳人間樂奏萬斯曲

枝上日轉咸池桑天皇初開紫府燕御前催賜黃金觴
誰乘風雲依日月臣有力牧君軒黃望雲仰見天不遠
簪花莫厭鬢如霜五風十雨自中國語從重譯傳名王
年年五月熟荔子又見北使朝連昌聖君當宁占寶曆
太史執筆書殊祥雲間雙闕日五色下被四表同堯光
風姿矯矯華省郎珩璜結佩鳴水蒼但將兩耳聽韶護
付與孺子歌滄浪傳杯遙想水殿冷畫鼓咽咽清晝長
諸公約遊諸山而雨分韻得蓮字

華省繆通籍羣公接蟬聯坐曹苦無事笑語相周旋蛛
塵生印窠雌黃入遺編賜沐不及舍環湖走層巔况乃
三神祠彷彿在雲烟蓐食戒明發著鞭飛曉韉白石望
磊磊跳珠忽濺濺咫尺不得往使我意惘然誰當却豐
隆曠蕩開青天同昇太華頂共摘玉井蓮斯盟可重尋
慎勿輕棄捐

次韻王興周齋宿省舍

念昔始解事結交少年場一生徒苦辛兩鬢今成霜頗

亦恨晚歲始得同舍郎邂逅笑語間彷彿芝蘭香朝吟
共斐几暮歸霑餘觴忽奉太室祠共薦房俎羊曉陪奉
常班瓊珮參翱翔只今坐齋宮夜雨誰對床王事間何
濶咫尺遙相望聊持鷓鴣挽為澆冰雪腸五字忽鼎來
古錦翻詩囊無力攻長城有眼驚夜光跂彼笑織女不
復成報章何當畢祠事共上南山岡更約顏李蕭一笑
同徜徉

次韻蘇君叙暑雨大有秋意

五月癡雲爛不收
麥風先借一天秋
聊煩細雨催幽句
更把新涼洗客愁
人物似君真楚楚
功名憐我亦悠悠
謾將無限思歸意
欲向回中著釣舟

次韻艾主管觀僕楚詞贅說見貽

傳記區區考異同
文章空愧楚人功
窮年弄筆知何事
芸葉香中作蠹蟲

次韻袁時良司理二絕

白頭身落亂書簾
粗遣殘年不記功
乞得門官歌楚些

始知君德被昆蟲

人說篇章晚更雄
建安諸子未為功
今朝春草傳新句
昨夜燈花綴玉蟲

再酬艾主管袁司理二首

鼯鼠終成五技窮
老於文字苦無功
謾將平日雕龍口
細為離騷說豸蟲

兩公才力可爭雄
翰墨頻收戰勝功
笑我窮年辨烏鴟
却將人事校鷄蟲

孫耘老惠龍尾硯漆煙墨報以二詩

自喜新交得管城政愁無地喚陶泓
孫郎不惜分龍尾付與詩人了一生

詩翁無復思如泉墨客能回漆作煙
何意崢嶸四君子肯來相伴一燈前

今歲中秋無月閏八月十五日夜月色明甚二
首

月欲離滄海雲猶暗夕樓天教雙病眼
重看後中秋玉

色依然在霜華只自羞一杯遥酹汝容易莫西沈

秋意關心切蟾光見面難欲成邀月飲頗恨與誰看天
近瞻銀闕雲空見玉盤老夫渾不寐歡喜一憑欄

次韻庭藻秋懷三絕因以見招

擬趁牛山九日杯煩公催取菊花開青天有月無人喚
却喚樽前惡客來

山橫鳥外白雲邊酒滿秋風落帽前老子要詩那得句
湖天欲買不須錢

不見元龍少日豪
還將萬事等秋毫
只今風味猶如許
醉看霜前斫兩螯

奉酬陳彥有用庭藻韻示三詩

欲遣新愁入酒杯
好懷知復為誰開
此生憐我星星久
何事令君得得來

廣文貧甚坐無氈
白壁朝來忽滿前
但喜囊餘長吉句
絕勝家有窟郎錢

南徐隱士詩兄弟
君更眉間有白毫
一染函牛鼎中指

暮年方悔嚼空螯

次韻庭藻觀潮

八月既望秋風高羣飛海水催江濤

海水羣飛揚子雲語

水來中

州八萬里至吳乃折微傷豪

語在盧肇海潮賦

當日潮來如箭

激萬弩迎潮射鳴鏑風吹海立猶至今雪卷千堆濺青

壁人間有海詩有翁健如駕浪長江風詩成便可作圖

畫歲好莫漫占凶豐坐中客怕噤不語憑高下看馮夷

舞殘音到石未肯回澎湃猶能作宮羽人生快意難預

謀眼事盛事心懷羞老病無人喚我出閉門枉度三中
秋

次韻庭藻再賦觀潮

海門白浪如山高還從巨海驅洪濤何人戲出此偉觀
撩公傑句爭雄豪詩成飛電欲爭激戰勝何嘗費鋒鏑
更復盡出武庫兵不念長卿家四壁當時年少今老翁
愁將白髮吹秋風來趁千人萬人出尚記時節如元豐
袖手人知公作語歌兒停歌復停舞越山迎浪看潮頭

白玉傳觴急飛雨胸中如公多廟謀八珍未獻伊鼎羞
笑人欲買江邊宅看潮飽度殘年秋

次韻彭叔容

彭郎作詩調最高語中起伏多波濤維其有之是以似
千佛名經中一豪潮從海來與山激彭郎詩成疾飛鏑
詞鋒何止却千軍脆敵何堪守堅壁去年載酒呼衰翁
蕭蕭兩鬢吹江風手持鼈尾白玉柄坐中風味王安豐
今年不出無一語想像紅旌浪中舞卧聽東來響怒濤

安得西飛有雙羽晚歲菟裘誰與謀有如此江真可羞
會待潮來復潮落短蓑獨速吳江秋

次韻李宗丞秋懷二首

河朔三株樹霜高不受侵日邊初識面詩裡復論心愁
莫令知處杯須畧放深弟兄俱絕唱一世少知音

身作三吳去霜從兩鬢侵羈棲臨老日牢落少年心好
句何曾得清秋幾度深越江憐久客時送海潮音

曉色

曉色明龍闕金爐近御床黃簾猶卷月清蹕已鳴霜海
宇無兵革公師在廟堂但聞宮樹鳥日日轉朝陽

紹興丙寅歲當郊祀積雨彌月已而大雪前事
之夕雪霽月出越翌日天宇開霽日色晏溫
天子乃躬祀於郊丘賦詩二十韻

寶歷三千歲龍飛二十春胡弓不窺月塞馬自無塵
禮樂湮淪久君臣制作新誠心躬廟饗大祀肅郊禋
密雪埋羣嶂凝陰翳上昊九枝騰曉日萬騎出嚴宸

輦路晴沙輦宮城宿霧勻崇壇方輦造蒼壁遂前
陳秀色霜明俎華滋露濕裊馨香登柜黍繭栗薦黃
搏月引笙簫度風傳贊祝頻依稀望璇極髣髴降天
神皎皎星垂象沉沉夜嚮晨一人宣玉冊百執奉朝
紳欲識蒼穹意當知肸蠁臻歷年綿聖祚敷錫惠斯
民回駕蒼龍闕旋軍羽衛屯拜恩元老重沛澤萬方
均盛世無遺典中華有聖人書生亦何幸奔走綴祠

臣

次韻艾主管約同居酬唱

老年無句上詩壇
晚向荊州始識韓
馬歷險艱知足健
樹從黃落見根蟠
不妨論好同膠漆
已復書盟在肺肝
許我三冬共燈火
不須衝雨過蘇端

再次韻艾主管


艾侯人物似芝蘭
不數淮陰袴下韓
筆底波瀾驚浩渺
胸中書傳想縈蟠
厲施固自無妍醜
楚越何曾異膽肝
一笑相從亦何事
共看明月上雲端

次韻蔡平仲梅花用玉局海南韻

老翁腸斷江南村誰將楚些招歸魂月明常憶看花處
斷橋流水天黃昏一行作吏此事廢日涉漫記柴桑園
天憐羈客老且病玉琢妙語清而溫當時飽喫惠州飯
十年來負蠻鄉瞰花飛白雪颺欲起瘴濕黃茅人閉門
為公復誦海南句寒牕掩卷淒無言傷心起酌玉局老
夜半獨瀝瀝鴟夷樽

次韻仲平雪中之作

少年何嘗屈此膝自料一生能幾履誰知臘月雪蔽空
三日衡門斷人迹心知無事止坐詩天解窮人無乃力
故山欲放雪中梅空恨此中無鐵石中郎官熱亦怕寒
著意說窮聊作劇北風吹酒天始愁玉雪滿空心自憚
想君鹽絮方入詩憐我鬢鬚同一色山行安得趁驂騑
快踏瓊田四蹄疾



太倉稊米集卷二十六

欽定四庫全書

集部

太倉梯米集卷

二十七至
三十

詳校官庶吉士_臣李如筠

主事_臣呂雲林覆勘

總校官編修_臣倉聖脉

校對官中書_臣高中

謄錄監生_臣訖鳴謙

欽定四庫全書

太倉稊米集卷二十七

宋 周紫芝 撰

詩四十六首

時宰相生日樂府三首

并序

某嘗歷考自昔大臣身輔帝王名垂書傳而
得光明盛烈足以夸耀後世者不可殫紀如
商阿衡周尚父之徒雖號為傑然不可跂及
然皆未免於兵於是後世喜言兵者皆曰是

數人者以此而定亂以此而成功徃徃亦以是說而說其君蓋將以邀利於一時而其黷武之弊有不可勝言者矣夫善師者不陳班固所以言堯舜之兵也不戰而屈人揚雄所以言堯舜之兵也由唐虞以來不知其幾千百年世間有好戰以危國者未聞其以不戰而定亂也今太師大丞相魏國公以堯舜無為之道而事君以堯舜好生之德而用武用能

不戰以成功自修盟以來至於今日不交一
戟不遺一鏃而天下大定其不世之功無窮
之利使有班馬之文蘇張之辨安能一書再
書而足況若某之拙於文辭宜不能措一字於
其間而向之已陳者又不復以黷聰明之聽
日者郊祀之夕瑞雪收霽大禮告成太史占
星殊祥並出某猥以賤吏駿奔祠事禮成而
歸道聞父老之言歡呼載路嘗欲述以為獻

無因而前會太師之壽日乃敢採為歌詩作
樂府三章相與行道之人壽而祝之以示區
區報德述生之意詞雖鄙俚意實鄭重蓋嘗
以謂方今揄揚盛德稱頌大美者日至於前
不啻若弦匏金石之並奏未嘗一日而不入
於耳也然則安知厭聞雅頌之音者聽蕢桴土
鼓之樂負薪扣角之歌而無取焉此某之折
揚皇芻所以得至於鈞庭之下也謹序

帝居七星中紫宸黃金掣銷天開門中人傳詔不動塵御
府拜賜天爐芬鬱金蘇合百和勻雙虬鏤合盤雕紋雲錦
織帕勞天孫金狻猊擁春空雲流霞一酌千日醺壽公遐
齡天語溫朱絃白雪聲調新洞庭之樂人皆聞官家異禮
尊帝臣八師七友無此勲聖賢一出五百歲開闢以來能
幾人東方曼倩何足數三食仙桃識王母何當移植上林
中歲歲年年見花吐溪上人家自一川武陵邂逅非神仙
但令父老不識戰人間何處無桃源自從罷武得生活垂

髻小女皆能言肯為八方開壽域廟堂政要公調元

甘泉羽書久不至六樂初成禮初備萬兩黃金鑄景鍾八
級層壇築圓陸侍臣曉入明光宮彤庭暖日升曈曨弦匏
鼎俎耀前列大聖制作垂無窮太常為旂玉為輅路穩沙
平試天步日邊風雨曉前收夜半笙簫月中度君臣有道
道格天五星同色三台圓千官拜舞皇輿旋青城路遠聞
鳴鞭黃麾羽葆識全仗繡衣雷鼓鳴鈞天羽林騎士如流
水未央宮闕明山川千門萬戶不知數盡捲簾幕瞻龍顏

道傍父老百歲許醉倚春風自相語昔年舊事一日新廊
廟功成不因武羣生欲報知何緣再拜願壽公千年

海上神仙不知數無人解說三山路舟中彷彿見霞裾
弱水波深不堪度青天那得白日昇仁能愛物功乃成
秦漢之君俱好武枉從方士求長生從來定亂必以戰
公以不戰為中興兩朝歲活數百萬報公福祿知難名
只今潭潭開二府富貴如山澤如雨經殿時聞御幄香
日對清光接天語歸來下馬復過庭一德樓邊柳陰舞

天上頻移璫琕筵瓊漿賜酒如流泉盛事傳觀作圖畫
蓋珠何處求羣仙皇天報德何時足政恐天心似人欲
會從四世數五公何止長年是公福

次韻蘇元藻對雪長句

晚來風定雪初平到手杯行不暫停夜色遠欺江月白
天花寧羨野梅馨遙瞻玉闕心先喜一見瑤林眼自青
回首西湖在何許借君詩作遠山屏

次韻艾主管歲除有感

藍尾先迎替臘春
流光依約似行雲
功名如夢日月晚
兒女滿前恩意勤
此夜自傾桑落酒
誰家政舞石榴裙
窮諧歲歲年年事
老坐奇奇怪怪文

雨中梅花猶有存者

江雨無情不管人
殘梅有韻故相親
閉門無事仍無客
花作羞娥酒當春

正月二十八日雪晴睡起

沉水空濛睡欲醒
寒窓窈窕日初晴
誰將昨夜堆簷雪

為作空階滴雨聲

梅樹花邊日脚紅
鳥偷微暖轉東風
寒窓喚起無人見
獨倚欄杆看雪融

次韻余宅仲答陳先生

何曾留得守囊錢
長坐羈愁只斷編
我已自成窮活計
君猶為看小行年
莫驚久客推難去
況有吟詩盡可傳
更看同升門下士
中興自昔要真賢

送錢端修侍郎二首

人間編削要研摩，富貴聲名不奈多。
似我豈容窺玉海，如公真合上鑾坡。
依光日月心應在，回首湖山意若何。
白鷺洲前留不得，却歸京洛擁鳴珂。

晚竊官囊五斗陳，笑談猶喜奉冠巾。
望塵羅拜何曾解，拄笏看山了不嗔。
自古知心能有幾，如公厚德更何人。
錦帆畫舸江邊路，愁看飛花落絮春。

次韻陳先生

羞對湖山照病容，浮家全似陸龜蒙。
掃除故里三年夢，

邂逅幽人一笑同酒會驅愁常恐薄詩能窮我不須工
兩家好客今安有為作緇衣補國風

三月二日同游西湖諸公有詩次韻

水繞青山寺人携白玉觴晴春方爛漫醉眼自微茫舟
穩欺風軟杯深送日長誰家載歌管紅袖立斜陽

上巳日雨中熟睡二首

吳波越嶠翠爭流過盡殘春懶出遊花下看誰飛白馬
雨中憐我擁黃紬

細數蘭亭歲月長當年舊事久淒涼但欣越女山前雨

暗入羅敷陌上桑

江南以上已
雨宜桑

次韻孫子紹山礬

造化出尤物餘芳若為容遙知補陀山天香落巖風題
評付大手妙質煩天公捧心陋嫫母彼美唯孟庸但恐
兩無情一笑花遂空賴此絕世姿墮君幽句中相識苦
恨晚著語今復仝願偕九畹蘭結根永相從可憐金錢
花亦薦白玉鍾勿遣倡條滋亂我風露蘂

趙觀察作齋名煙艇孫耘老作唐律相邀同賦

乃次其韻

知君心本在滄洲故揭寒齋作釣舟已遣江湖頻入夢
便呼鷗鳥與同遊浮驂未可追前事畫舫猶堪擬勝流
笠澤有家歸未得斷腸蘆葉荻花秋

次韻方元相見寄

數椽元著亂山麓強入天街踏軟紅老去只思青眼舊
詩來猶數白頭翁身游吳越千山外春落邯鄲一枕中

賴有可人俱在眼，舉杯惟欠與君同。

睡餘飛絮滿庭有感而作是詩

春水綠波南浦路，兩岸誰栽楊柳樹。
含桃熟盡未聞鶯，荷葉生時已飛絮。
絮將春去不可回，人伴雲間更須住。
我亦隨君似落花，欲趁春風到何處。

醖醖小壺色香俱絕燈下戲題二首

芳條秀色淨如霜，折得殘枝近筆床。
月冷燈青花欲睡，可憐虛度此時香。

春事何時屬老人
好花知復為誰分
何當碧玉壺中雪
飛作香羅髻上雲

次韻度藻酴醾

憶昔在江國
屢醉酴醾春
平生看花眼
老暗京洛塵
王城一見之
玉顏猶可珍
但恐花見憐
憔悴非昔人
是事姑且置
飲我樽中醇
幽姿不可名
清芬難具陳
誰登玉宸殿
與梅差等倫
山礬豈其弟
月姊當與親
頗笑凡質陋
始喜國色新
此論那可廢
此冤聊可伸

魯直水仙詩
云何時持上

玉宸殿乞與
江梅定等差

效王建體二首

金獸分香賜老臣
全家望闕拜君恩
教坊催樂排春燕
中使傳宣勸御樽

日轉彤庭柳影移
微涼殿閣麥秋時
侍臣朝罷歸來晚
又見金盤賜荔枝

送馮遠猷使君

雨露朝來下九天
左魚還得舊青氊
莫辭去國逾千里

猶勝為郎動十年客至何妨常有酒民殘政自不須鞭
欲安遠俗惟無事聖主休兵本息邊

江上當年憶語離相逢雖健鬢如絲心知涉世著幾屐
眼見承流換兩麾臺閣異時須獻納廟堂今日要招携
九江太守多仁政此去知公得吏師

凍雨行

五月江天未徂暑日日江雲釀江雨眼驚雪浪打秋濤
卷地風來雨如許窮人賦屋纔一椽茅茨零落仰見天

風樓不定夜未曉旅食過午庖無烟家無鞠窮病在
腹兩股重脰成蹢躅麥雖黃落雨未止雲欲漫亂風
還顛詩成有淚收不得人生如此亦可憐君不見章
臺走馬張京兆彈壓功成在談笑不將鉤距作神明
自此長安無惡少邇來持節鎮七州令行幕府如清
秋尚書地已八座貴况復功方三輔優應笑南來雙
病鳥千里依人作昏曉鄧林有木暗如山誰與安巢

著林杪

閩州太守以桃竹邛杖二物遺余宅仲而宅仲
出以示僕喜而作詩

萬里何嘗入巴蜀少陵詩中識桃竹更言九節奉真仙
無乃邛山有遺族平生二物幾到眼誰與周旋慰幽獨
忽然渡海飛蒼龍夭矯當前峙雙玉江心石竹誇堅剛
摩挲紫焰生寒光孤筇節高不可及外雖似曲中直方
閩州得此不敢藏亟遣二士相扶將余侯新佩太府章
六尺骭髀身健強未須御府賜靈壽行勒金狨朝未央

老人勃窣不足數惟有泉石成膏肓東吳自是山水窟心雖欲往身未償會須呼客共蠟屐借君拄杖聊徜徉

送袁司理歸天台

長安少年郎意傾裘馬中水鳧偶相值蘭臭豈復同誰令千金璧照此白髮翁得之非人力捨去真天窮

五月畏塗暑千里苦炎燄天台大士廬妙境在寥廓解鞍修淨供茗椀應自淪安得從君遊享此方外樂

妙哉揭陽君文起八代衰平生誦公文手自不停披只
今老眼暗刮膜無金篦天台有巨刻君其為致之

次韻文若與余相遇武林之作

南來衝雨著征衣山下黃梅正熟時老大相逢真是夢
寒溫以外只談詩樂丞游宦聊因酒陶令絃歌政坐飢
人物似君那易得一蓑歸釣未應遲

送魯宏父守南徐

異時連佩漢魚符兩奏殊庭報政書黃屋要聞當日句

朱幡又擁使君車風流舉世推前輩文采須公侍禁廬
想得西樓未回首已催尺一到南徐

雨中對竹清甚效江西作六言一首

雨色按藍潑黛風莖戛玉鳴珂不復作可人語奈此數
君子何

次韻伯遠食楊梅十五韻

徐侯嗜吳梅健啖殊未闌喜氣入新詩脫手如彈丸遙
想蒼玉枝尚帶白露溥日食三百顆語客疑誕謾何妨

携束書常作東南官掇彼南山粲奉君一酌歡南山有
佳樹采采何時殫恨我無報章上可追建安誰知丹砂
粒亦滿黃金盤回甘似蔗境嚼齒餘詩酸安得移此種
飛舟下驚湍紅園奪朝霞翠密回翔鸞大勝萬里來日
曬中枯乾歸期渺何許且復同甘餐調冰漬崖蜜却暑
資微寒

與叔容上天真臺題石壁用坐中語也

我生猶得問天真淨洗頻年馬上塵此地何妨來著我

老僧原自不嗔人

天真寺白拒霜

天上登雲寺人間白拒霜
山僧方宴坐魔女不施粧
玉色寧非韻冰姿不受香
須當和月看夜宿贊公房

次韻仲平十八日觀潮

吳兒輕生命如線赤脚翻身踏江練
南人慣看心不驚北客平生眼希見
海上潮來雪不如中郎詩成錦初爛
句法豈但窺澄江壯士何從挽天漢
飛流濺沫不足論

萬壑千巖此為冠解言越嶠翠摩空歲與浪花爭隱見
我亦蒼顏閱九州始問江神得奇玩六年東望西興雲
歲月崩奔一飛箭擬將匹練作江圖歸與故人誇偉觀
倘從江海識波濤分逐秋蓬共流轉試令海若語馮夷
慙色自應須滿面誰當更草海潮篇詞采風流付王翰

次韻相之木犀 三首

木犀韻勝無人畫合在詩翁阿堵中已寫幽姿入新句
莫將遺恨怨秋風

異時茅屋東邊樹黃粟吹香趁水流旋買殘枝供燕几
為誰辜負故山秋

蘭芳九畹是同流薜荔江離格未優不為巖花作佳傳
靈均空說楚江秋

雨後頓有秋意得小詩四絕

九衢殘暑厭風埃兩日陰雲遂不開造物固應知客意
急催新雨送秋來

只今風露欲凋荷前月牽牛已渡河絡緯獨知秋色晚

芭蕉添得雨聲多

近曉殘更挽不留
窺簷起看月西流
空庭草樹俱無語
只有寒蛩解說愁

秋深時節在家鄉
憶得黃花未著霜
故國不堪回首望
綠樽辜負五重陽

次韻子紹雨中游北山禮白衣大士

官冷長如賜沐閒
門雖漫設晝常關
勞君馬上風前句
畫我湖邊雨外山
落木半巖秋色裡
曲欄千尺暮雲間

白衣大士應憐我忍對高人不厚顏

太倉梯米集卷二十七

欽定四庫全書

太倉稊米集卷二十八

宋 周紫芝 撰

詩五十八首

九日陪李德儀兄弟游石屋

秋雲易雨秋日出九日陰晴苦難測氣如昨夜太暄妍
雲似今朝好天色天公要渠作好語著意安排費天力
重到孤峯最上頭四年不見煙霞秋吳山長與越山對
海水自隨江水流江水相見只如此老大豈知爾許愁

上山燃火入山腹下山騎馬尋石屋十八大士棲兩巖
共向山中禮尊宿人言石縫泉作珠却繞山根走鳴玉
珠泉得名固不虛虎泉作酌不滿欲山僧應復笑我曹
醉中泉石蒙譏嘲涇渭分流正須爾美惡賢愚亦如此
寧將鷄肋奉尊拳莫著陽秋在皮裡此語如何可便參
聊供山僧一笑喜

跳珠虎跑山中二泉名

題齊安新刻雪堂圖

名駒汗血久不聞天遣兩蘇空馬羣當時二十出西蜀

已說賈生能過秦玉堂詞翰不起草建隆以來能幾人
功名後世只忠謹流落一生常苦辛心知才大難為用
小折波濤入嘲弄偶結江邊一把茅來作黃州十年夢
勸君慎勿剪柔柯雪堂楊柳公親種扁舟夜入赤壁江
手持杯酒酹周郎酒醒月落賦已就東方欲白天相將
邇來不知誰好事畫寫公詩畫圖裡短軸雖在人已亡
空著江波接天起浮雲滅盡名不磨千古長流似江水

次韻庭藻題寒林渭川二圖二首

煙水蒼茫認翠巒寒林正在有無間何人乞與并州剪
分取江南一半山

煙梢零亂一川寒換得天孫錦繡端却憶東窓舊時竹
年來新筍盡成竿

送蘇元藻

蘇侯新拜外臺官目送扁舟杳靄間我亦漫同千里月
天教飽看七州山欲知此別無窮恨政坐相逢一笑閒
携酒却來湖上寺不堪重對小孱顏

游多福寺寺有佛牙光色殊勝而安定郡王墓
在其後二絕

吹盡青絲兩鬢華旋栽林下老生涯已携齋鉢分僧飯
更炷香雲禮佛牙

千古風流挽不回滿山秋葉寄餘哀秦璫人去今何在
誰釀黃柑薦一杯

蠅館晨起效柳子厚

拂席坐清晨幸脫塵事窘閒焚石鼎熏細誦華嚴品從

迷索初心悟意嗟歲晚庭蕪日延蔓零落費鋤墾何當
畧邊幅乃或窮奧閫餘年倘無恙願就一廛隱悠悠藉
至言廓廓窮妙本會須師瞿曇未足慕嵇阮

勅局晨入效柳子厚

朝陽下屋角白露收莓苔蒼黥知我至鉤簾喚風回破
曉中庭花時傍修竹開事簡吏亦暇日高官未來取我
囊中詩炷香拂輕埃所恨諸公間疲駑愧非才敲茶驚
午夢共淪風前杯支頤坐晝寂細影移高槐斯須各回

鞭跨鞍尚徘徊雖非大三昧亦號小蓬萊

寄題閭郎中家園亭四絕

人間建業江山地上星
郎水石居擬作扣門看竹客
可能容我小踟躕

嶺上孤松散落照水中
花鳥散餘霞人疑五柳先生宅
又似三堂刺史家

築成涼榭初宜月
剪盡繁枝始見山
天亦料公閒未得
故教幽事頗相關

屬玉雙飛下綠蒲
小溪分水照林廬
疏泉漫作江湖意
不種封君萬尾魚

相之庭藻邀賦齊氏赤芝詩

歸雁亭空劍戟場
天教人物發幽光
書傳父祖人猶說
名到仍雲澤轉長
朱草只今應有譜
紫蘭何處不聞香
我無筆下芝房曲
付與南宮二省郎

九月十六日示內二首

又見黃花日清觴
且對飛白頭
夫婦少無事
笑談稀官

小何時去家貧幾日肥更須煩德曜相伴老殘暉
小閣秋風冷青燈病眼昏酒重斟壽醖兒喜有雙親書
種吾家事郎曹汝舊門人生唯老健餘合付乾坤

木魚歌和碧巖子

并引

碧巖子夜宿官舍聞有持木魚報曙者乃作
歌蠅館主人聞而和之

秋蟾欲落霜滿屋道人懸魚擊剗木誰將發發水邊聲
驚斷齁齁鼻中曲此生自是在家僧便恐箇中緣已熟

安得華鯨吼夜廊去赴雲堂五更粥

劉蘄州見和木魚歌再賦二首

秋雨平欺玉川屋向曉寒窻風撼木道人閒作木魚
歌使君肯和無絃曲枯魚剝啄渠自鳴客夢依稀我方
熟此身安得在蘄州去覓君家咄嗟粥

五更木魚鳴繞屋喚起烏衣曉登木鼓殘千疊萬疊聲
亂盡長清短清曲天邊孤月猶復明世上黃粱欲炊熟
老人雖起亦何營但飲南窻一杯粥

碧巖子作詩為小兒求紋襖戲作三絕

近來聞道得明珠丹鳳今年第幾雛會遣夢中分赤錦
不妨衣上有天吳

逸驥忽生千里馬新詩來乞百家衣老夫安得天孫段
只有羊裘坐釣磯

舊來人說陳驚坐真有詩如孟浩然莫厭敲門覓紋襖
此翁衣鉢要渠傳

次韻庭藻與陳相之李子至定尋梅之約見示

西湖三見青春面無人共醉山間梅晚逢詩老看古
雅如入周廟觀山壘我所思今在何許昔望長江隔
淮楚三月春前始識君倚杖看花聽君語我今欲赴同
襟期老情可得如年時清歡既少飲不足枯腸欲盡詩
應遲衣冠此地多佳客相逢四海無南北天將此樂付
公等一枝方訪春消息老夫老矣何能為折花夢作春
山歸

次韻庭藻折梅懷周秀實

風流掃地難挽回二老人物似蘇梅時從花底飲落雪
醉卧沙頭雙玉壘平時交分心相許晚歲相思各秦楚
孤山籬落固依然縱有此花無此語周郎別去當有期
歸來不復如瓜時天應知客頗有恨花亦憶君尚未遲
我游東吳身是客夢到江南與江北安得馬背如孤鴻
萬里從君聊一息只今春草還萋萋會須急喚王孫歸
次韻庭藻追記去歲與余游西湖舟中聞火而

歸

漫郎移舟入小回醉著幅巾歌落梅老夫但倚紫藤杖
袖手恥看黃金壘忽漫相逢遽如許醉後高談俱楚楚
百尺君卧元龍樓醇酎我羞公瑾語從來悲樂難預期
人生快意能幾時紅光屬漢勢未已短艇掠水歸嫌遲
只今俱是京塵客君居巷南我巷北天寒飢餓不出門
遣騎時來問消息江邊久客知何為白頭拾遺徒步歸

蔚齋

山雲未成雨斂藏方寸間會當不崇朝一雨膏人寰人

言隱霧豹依約在南山試從管中窺何止見一斑人生
患無才富貴天豈慳二士偉人物萬里來間關行陳治
安策遂拜咫尺顏豈容十里湖長吟對煙鬟願君如鸞
鵠摩霄共追攀雲出豹亦變何止銅與綸舉首望長途
分當落榛菅鵬飛君方高鳥倦我亦還

次韻庭藻讀少陵集

李杜文章萬丈高就中詩律少陵豪風流自是渠家事
奴僕從來可命騷

濯錦江頭可一杯碧鷄坊口草堂開十年劍外無相識
黃四娘家幾度來

玉燭初調大厯年先生偶脫萬兵前誰教早獻千金賦
可得看囊更有錢

睡餘賦東牆雪竹

飽食枕方便過午茶未杵撥火理殘香倚窓翻故楮尋
我東牆隅枝筇散腰膂朔風寒蕭蕭修竹靜楚楚枝頭
雪猶在秀色乃如許竹固不受寒豈但不受暑老翁日

日來相期伴君語誰能與俗人昵昵作兒女

章彥漙決獄五羊歸登鬱孤臺得東坡石刻見

遺報以小詩

一見蒼碑眼自開便疑身在鬱孤臺可憐決獄章廷尉
不帶將軍薏苡來

四聖觀後山亭

附山結真祠朱門照湖水湖流中入池秀色歸淨几風
簾邃旌幢神衛森劍履清芬宿華殿瑞霧蒙玉宸彷彿

還神京想像輪奐美祈年開新宮祝釐奉天子良辰復
難會歲暮得斯喜況乃清樾中飛樓見千里雲車倘可
乘吾事良已矣當賦遠遊篇未可回屐齒

太一宮成奏告禮畢秦樞密有詩示秘閣次韻
一首三絕

聖主均休錫庶民親祠遙望屬車塵雲旗欲下精誠格
絳闕初成制作新肅肅衣冠嚴祀事雝雝簫鼓降明神
椒漿一酌能多少散作人間萬國春

漢家何事築通天漫費當年九府錢
躋世本期開壽域
祝釐端合報長年

玉帛新祠太一神廟堂生育轉洪鈞
侍臣俱從甘泉駕
萬世何人繼後塵

至治非關黍稷香可須巫覡降殊祥
公今重草周公頌
不和東皇第一章

楚詞九歌祀東皇太一為篇首

次韻伯遠梅花

徐侯頓朱墨豈復知花時美人忽含笑
臨鏡窺漣漪朝

來摩兩眼喜作雲霧披須煩春草句詠此玉雪枝小窻
惜無人共賞林下姿毛褚二三子亦足相遨嬉

立春三絕句

暖風融雪晴方好春意催年老自悲故國未歸空有夢
梅花欲動又題詩

地下青風欲到時土牛何得解先知墻邊雪裡梅花樹
已借清香入舊枝

多病誰憐澤國人眼明羞見綵幡新滿傾吳地千鍾酒

細說長安六度春

再賦立春效王建三絕

蒼龍闕角曉光明日近彤庭瑞霧溫殿下百官猶未入
閣門催引謝春幡

御溝冰暖欲生渦律管灰飛氣自和已進玉堂春帖子
六宮無事笑聲多

聖明天子見昇平二紀頒春下禁庭今歲御前爭進表
明年七十賀慈寧

七閩山中竹皆有實多至萬斛民賴以食歲且不飢作樂府短歌以紀異事將以俟採詩者擇焉蓋詩人之職也

七閩山中地不足徃徃連山暗脩竹今年是處生竹花
竹米登園日千斛大家炊飯餉田夫小家作糜飢飫腹
官雖賦田無上地民不扶犁得中熟福唐太守不敢藏
青版成囊獻黃屋黔黎鼓腹慰天心宣付汗青書日錄
山中父老雪滿頭何曾眼見天雨粟漫將蓀旅屬珠星

誰問廟堂調玉燭人言丹鳳餐竹實玉粒先來自山谷
會見雙飛入建章萬年枝並看鸞宿

奉和黃文若贈刁文叔

昔日風流守流傳父老知諸孫今若此天意了無疑醉
裡開愁眼燈前得近詩聞名真已久識面更何時

次韻文若贈黃叔魚

倦客愁如許他鄉歲屢更衰顏人共笑遺恨老難平我
欲隨歸夢君誰共月明嗣宗賢叔姪況有各才名

曉枕不寐書所感三首

昔年殘夢曉初回
花上啼禽近小齋
可笑只今春夢裡
五更歌枕聽籠街

南市津頭憶買船
花姑溪上釣晴煙
老來安得孤蓬夜
橫枕蓑衣聽雨眠

白髮心知萬事休
力耕猶欲種春疇
五更卧聽雞催曉
殘月開門起飯牛

晚霽欲歸三絕

雨後兒童喜欲顛老翁不出自欣然晴天霽色渾無用
只乞斜陽了斷編

花樹窓前睡足時斜陽忽到雨邊枝白頭可笑閒居士
又寫春晴入小詩

印顰初封馬在庭杖藜猶傍竹邊行老兵莫漫催人去
且聽幽禽說晚晴

分雙魚箋贈徐伯遠

水底雙魚不上鉤粉金翻樣滑如流我無三昧詩中手

乞與君脩五鳳樓

次韻戴文舉陳季陵見索故藁

短兵無力可交綏
強敵當前敢出奇
況我龍鍾臨老日
值君三五少年時
擬將衝雪騎驢句
換取看花走馬詩
病思誰能更搜索
但拳雙臂作支頤

送文若歸嘉禾二首

烏帽猶衝九陌塵
扁舟誰釣兩溪春
久憑歸夢尋香國
忽喜清樽對故人
滿眼窮愁嗟我老
此生交舊獨君真

華亭一水無多地細作來書莫厭頻

將軍十載半鳴珂才武憐君中異科但把長吟作回雪
不妨瀕海看熬波方愁隻影身如寄便買扁舟意若何
一別應須五年事好詩從此為誰哦

西湖詞二首

吳中小女結煙鬟自打青腰唱採蓮欲趁歌聲過南浦
藕花深處不通船

湖天無盡月如霜露濕荷花別是香何處漁郎解吹笛

並頭驚起兩鴛鴦

太倉稊米集卷二十八